

戶部則例



戶部則例

鹽法下

一直省鹽差。順治初。差長蘆兩淮兩浙河東。巡鹽御史各一人。總理直隸山東山西河南江南江西浙江湖廣陝西鹽政。一年更差。其福建四川廣東廣西雲南貴州六省鹽務。舊隸巡按。後改隸巡撫。○康熙七年定。長蘆等四處鹽差。於六部郎中員外郎及御史內。每處選差滿漢官各一人。筆帖式各二人。○十年題準。鹽差御史不拘滿漢。每處止差一人。○十六年。停止鹽差。



筆帖式。如差滿御史。仍帶筆帖式一人。○又覆
準京城及采育里地方鹽引。向係崇文門監督
徵收。嗣後責成大宛二縣行銷。與各州縣一體
考成。○三十年題準。添設福建廣東廣西巡鹽
御史。○四十六年。

命廣東巡撫兼理鹽課。○五十九年覆準。將兩廣巡鹽
御史撤回。鹽政交總督管理。○雍正元年議準。
各鹽差筆帖式。停其差往。○又覆準福建鹽課。
令各州縣徵收。興泉道管轄。著總督管理鹽務。
○二年覆準。令各該御史。將鹽法諸書。按年纂

輯繕呈

御覽。并照式送部。以備參考。○又覆準雲南麗江府改

土歸流。其鹽井交與知府督令。經歷煎鹽。於本
處行銷。○又覆準廣東發帑收鹽。如產鹽無幾
之小場。地方官就近督收。淡水等各場。皆地勢
廣遠。產鹽甚多。該督遴選廉幹之員。分委督收。
○又覆準廣東運使管理五省鹽政。復設經歷
一員。以供差委。○四年覆準福建鹽場大使六
員。業經裁汰。但鹽政必須專官料理。方能裕課。
請簡同知通判知州知縣等四五人。發往福建。

委任場務仍遇缺題補○又

諭

兩浙鹽政交巡撫管理欽此○十二年題準福建鹽

政衙門改為鹽法道專管鹽政

一貢鹽順治初定供用庫白鹽二十四萬一千

六百六十六斤內官監白鹽六萬二千斤青鹽

七萬二千五百斤光祿寺青白鹽十有四萬二

千斤以上每百斤加耗三十斤鹽磚萬斤計六百六十七塊鹽滷二

千四百斤神樂觀鹽六千五百二斤每百斤加耗三十斤

戶部都察院巡鹽御史官吏食鹽二十一萬百

有六斤每百斤加耗十斤以上均係長蘆興國等場辦

解遇閏照數加解○又題準部院等衙門鹽交

戶部察收貯庫給發○四年題準給發宗室及

官員兵匠人役鹽斤額數○七年題準光祿寺

鹽交本寺收○十一年題準諸王各官按俸銀

每兩給鹽一斤○十二年題準內官監鹽交宣

徽院收○十五年題準供用庫鹽交宣徽院收

○十七年題準將各衙門巡鹽御史食鹽俱令

變價解部克餉○康熙元年題準各監庫鹽仍

交戶部收貯○三年題準光祿寺鹽仍交戶部

收貯嗣後鹽除

內府取用外。餘令運司變價解部。如遇取用。仍解本色。○二十八年議準。長蘆運使煎辦貢鹽九十餘萬斤。內務府光祿寺每年取用三十餘萬斤。自二十八年為始。止令煎辦四十萬斤。其餘五十餘萬斤。停其煎辦。每包折價銀七錢五分。報部。○三十三年覆準。將長蘆三十三年三十四年額解鹽停止。俟用完時。再照例移解。○五十一年議準。長蘆運使解送備用青白鹽十萬斤。磚鹽百斤。於五十一年起。至五十五年止。停止解送。折價解部。俟五年後。每年止解青白鹽

六萬斤。磚鹽四千斤。交光祿寺。仍將應折價銀報部察覈。○雍正六年題準。青白鹽停解四年。○乾隆十二年題銷。光祿寺解青白鹽三萬斤。內務府解白鹽二十萬斤。其磚鹽折價。交與戶部。停其解送。

一鹽法考成。順治初定。直省鹽課。每年巡鹽御史及兼理鹽法。巡撫開列屬官職名。分數具奏。其州縣原額。並完欠細數。運使及管鹽法司道。彙造清冊。送部察覈。○康熙三年題準。州縣衛所官。銷引欠一分者。停其升轉。二分者。降俸一

級三分者降俸二級四分者降職一級五分者降職二級六分者降職三級七分者降職四級俱戴罪催銷完日開復○又題準御史差滿交代離任將經徵帶徵鹽課總作十分未完不及一分者罰俸一年一分以上降俸二級二分以上降職一級三分以上降職二級俱留任四分以上降職三級調用五分以上四級六分以上五級均調用七分以上革職廣東廣西福建四川雲南貴州兼管鹽法巡撫鹽課初叅未完一分者罰俸三月二分六月三分九月四分一年

五分降俸一級六分二級七分降職一級八分二級九分三級十分四級均戴罪督催停其升轉運提分司大使未完不及一分者停升罰俸六月一分者罰俸一年二分降職一級三分二級四分三級五分四級均戴罪催徵六分以上者革職經管鹽法司道府州縣官鹽課初叅未完不及一分者停升一分以上降俸一級二分三分降職一級四分五分三級六分七分四級均戴罪催徵完日開復八分以上革職署運提分司大使未完不及一分者罰俸三月一分六

月二分九月三分一年四五分降職一級六七
分降職二級均調用八分以上革職署理不及
一月者免議署管鹽法司道府州縣衛所官未
完一二分者罰俸三月三四分六月五六分九
月七八分一年九十分者降職一級調用署理
不及一月者免議接徵接催官不必各作十分
以本年鹽課總作十分扣算議處叅後大使限
一年全完分司限年半全完限內不完照州縣
官地丁錢糧例處分運司提舉限年半全完限
內不完照布政司地丁錢糧例處分管鹽法州

縣衛所官限一年全完限內不完原叅不及一
分者降職一級一二分三級三四分四級五六
分五級均調用七分以上革職兼管鹽法司道
府直隸知州限年半全完限內不完原叅不及
一分者降職一級停其升轉一二分降三級三
四分四級五六分五級均調用七分以上革職
兼管鹽法巡撫限二年全完限內不完原叅不
及一分者停升一二分者降一級三四分二級
五六分三級七八分四級九十分五級均戴罪
督催凡降俸降級等官均候交代有能於離任

之先將鹽課全完者。即準開復。如年限鹽課接徵接催官。原叅無名者。接算前官。總作十分限。半年全完。如不完。照初叅分數叅處。○四年題準。經管鹽課官。報明巡鹽御史察覈完欠。方許離任。如有未完。即準其離任。將御史降二級調用。○又覆準。廣西州縣官。咨明廣東巡撫。察覈銷引完額。方許離任。○六年題準。凡遇閏年。巡鹽御史。以十三月差滿。○十二年題準。各官任內鹽課未完。別案降調。丁憂離任者。罰俸一年。鹽池墻垣倒塌。行鹽無術。商販不行。或食鹽不

遵舊例。藉口不行鹽者。均議罰俸一年。○又題準。各官銷引未完八分以上者。革職。其戴罪督銷者。限一年銷完。如未完一二分者。降三級。三四分四級。五六分五級。均調用。七分。以上革職。○又題準。前官已完銷引。責成後官。一年內繳部。如不行送部。及題報鹽引遲延。或申報鹽引前後不符者。該管官罰俸。巡鹽御史兼管鹽法。巡撫照例議處。○又題準。鹽引未經題明。私自那撥者。該管官降一級調用。巡鹽御史降一級留任。兼管鹽法巡撫。罰俸一年。或將此縣引責

與別州縣未經申報者。府廳官罰俸一年。布政使。按察使罰俸六月。○十四年題準。巡鹽御史。鹽課未完二三分者。照舊議降級。仍留任兼管鹽法。巡撫。叅後不完。應降級者。均留任督催完日開復。至接管官。半年期限太迫。州縣大使。改限一年。司道府直隸知州。運使等官。年半。巡撫二年。如不能完。照初叅例處分。署司道府州縣等官。不及一月者。免議。分司大使。州縣等官。原叅不及一分。年限內不完者。降一級留任。再限一年。催徵如再不完。照所降之級調用。○十七

年題準。各官察出竈地升科。均照察出地丁錢糧例議叙。○二十七年題準。雲南土商小販。赴井支配。令將行鹽各府州縣。定完欠考成處分。令其領運行銷。先行鹽後納課。○四十四年題準。鹽政文移。向由都察院轉行轉送。嗣後鹽政一應事宜。有關各部者。該部徑自行行文。該差該差亦自行咨呈達部。仍具呈都察院存驗。○四十五年覆準。嗣後有商人告領帑銀者。坐商責令巡鹽御史等官。運商責令督撫州縣官員。確察行鹽地方廣狹。鹽本家產厚薄。出具印結。并

諸商連名互結。送部察覈。○五十年覆準。運司交代。照藩司交代之例。造具冊結。詳巡鹽御史。具題察覈。如有遲延。徇隱等弊。照例題叅。交該部。照藩司交代之例。議處。至甘肅四川雲南貴州等處。未設運使。其管理鹽課錢糧官員。交代之時。亦照此例。其運同運判提舉等官。均有催徵錢糧之責。亦照州縣交代之例。令該御史備具冊結。呈報部科。○五十八年議準。兩廣課餉考成。止列歲內經徵各官職名。嗣後兩廣行鹽州縣。將歲外接徵之官。亦按起止月日。未完分

數。計算考成。另冊附叅。其果能於歲內。將引餉徵解全完。或前官未解。接任官能催徵全完者。俱照地丁經徵例。議叙。○雍正二年題準。河東奏銷。例於四月。嗣後與地丁錢糧一例。總於六月到部。○又題準。河東舊例。殘引。均於三年內。通融繳部。新引。令巡鹽御史親齎赴任。自雍正二年為始。每年舊引。均於奏銷時。一次繳部。以杜重複影射之弊。歲前頒發新引。及時行銷。○又覆準。嗣後各省直隸州。督銷鹽引。巡緝私鹽。原係府同知經管者。改歸州同。原係通判兼管。

無州判者。交與州同管理。如銷引不完。及巡緝私鹽不力。該撫即行照例叅處。○六年覆準起解鹽課協餉。該鹽政督撫巡鹽御史預先移會前途督撫。飭撥官弁護送交替。嚴飭解官由大路挨站而行。如有疎虞。該管督撫即將經過之文武官弁照例題叅。著落分賠。倘該督撫御史不移會督撫。解官不知會地方。仍潛行小路。一有疎失。各官照疎防議處。其不行移會之督撫御史照僉差不慎例議處。私行小路之解官照枉道例處分。所失餉鞘著落解官名下追賠。如

不能完。即著落原差委之上司賠補。至解官欲就小道。該地方官詳報題叅。倘地方官聽其由小路行。一併題叅。○又議準鹽課未完。經徵各官均按分數議處。而欠課商人從未有處分之例。是以各商固結陋習。視欠課爲泛常。嗣後未完鹽課錢糧。經徵各官仍按照分數議處外。將各商名下應完鹽課作爲十分。未完不及一分者。責二十板。未完一分者。枷號一月。責二十板。二分者。枷號四十五日。責二十五板。三分者。枷號兩月。責三十板。四分者。枷號七十五日。責三

十五板五分者。枷號三月。責四十板。以上欠課各商。題叅之日。扣限一月。全完者免處。逾限不完。即照此例。枷責。如能於枷限內。照數全完。立時釋放。免責。若枷限滿日。仍不完納。除杖責外。即將該商。咨叅革退。所欠課項。以引窩變抵。未完六分者。杖六十。徒一年。限四月全完。七分者。杖七十。徒一年半。限六月全完。八分者。杖八十。徒二年。限八月全完。九分者。杖九十。徒二年半。限十月全完。十分者。杖一百。徒三年。限一年全完。以上自六分至十分。均將該商鎖禁。能於限

內全完。革退。不許充商。免其杖徒之罪。倘逾限不完。除將該商發配外。其名下所欠課項。均著落引窩家產變抵。如額徵錢糧。果能歲底。如數全完。令鹽政。按其課項多寡。量給花紅匾額。以別優劣。○七年覆準。兩浙各場。鹽課錢糧。令場員。就近設櫃徵收。原封解交各縣。拆併。是代徵之場員。非專管官可比。嗣後。除兼管專管各官。仍照舊例處分外。其代徵場員。如舊例。初叅未完不及一分者。舊例罰俸六月。今應免其議處。一分。罰俸一年者。罰俸三月。二分。降職一級者。

罰俸六月。三分降職二級者。罰俸九月。四分五分。降職三級四級者。罰俸一年。均免其停升。催徵再舊例。未完六分以上者。皆革職。今未完六分。應降職一級。未完七分。降職二級。仍令戴罪催徵。至八分以上者。革職。再初叅處分。既已改輕。則原叅各官。亦不便仍照舊例議處。嗣後代縣。催比之場員。舊例。原叅不及一分。年限內不全完。降一級。留任者。罰俸六月。原叅一分。年限內不全完。降一級。調用者。罰俸一年。原叅二分。三分。年限內不全完。降四級。五級。調用者。均降

一級。留任。再限一年。催徵。如再不完。照所降之級。調用。原叅四分五分。年限內不全完。革職者。降一級。調用。至原叅六分以上。年限內不全完者。革職。若有一場。坐落兩縣者。其場員。兩地未完分數。合算。併案議處。○又議準。山東商人。賣鹽完日。即令繳銷。殘引。如過期不繳。將該州縣。照失察例議處。如運使不揭報。照狗庇例議處。知情者。加倍治罪。○乾隆三年題準。兩淮鹽課。於二月奏銷。四月考覈。嗣後永著爲例。以歸畫一。○四年覆準。長蘆。河東。兩淮。兩廣。各道庫鹽。

課錢糧遇奏銷交代。照閩浙之例。令管理鹽政大吏盤察。○六年題準。各省經徵鹽課。督銷鹽引。催徵各官。能於奏銷前。催徵全完。或前官並未徵解。接任官於奏銷前。催追全完。總以一官全完。一年課引者。無論正署。均照地丁錢糧全完例議叙。其兩浙代徵場員。處分本屬減輕。不便與經徵官一例議叙。嗣後兩浙代徵場員。全完五萬兩以上者。準其議叙。五萬兩以下。奏銷前。全數通完。統計兩年合算。若將兩年應徵之數。徵收全完。亦準其議叙。通融銷售地方。不準

議叙。正課雖完。本年帶銷之項未完者。亦不準議叙。

一鹽法禁例。順治元年。覆準場竈。照額煎鹽。大吏親驗。按月開報。運使如有隱匿。以通同治罪。其商人。不許濫委雜役。行鹽水程。填明賣銷地方。完日。同引。繳察。不得告改。或鹽引焚溺。取具地方官印結。察實補買。○八年

諭。巡鹽御史及運司。不許於額課外勒索侵尅。如有貪縱各官。許商民首告治罪。欽此。○十三年題準。鹽政衙門。不許商役互充。○十四年題準。勢豪不許

占攬引窩商舖不許自定價值如有專利害民
串通經紀攬賣勒指等弊該御史嚴行禁飭○
十六年題準商人載鹽大小船隻俱用火烙印
記船頭不許濫行封捉○十六年議準將領衛
所官弁縱兵私販許州縣官緝拿揭報叅處○
十七年題準鹽場設立公垣場官專司啟閉凡
竈戶煎鹽均令堆貯垣中與商交易如藏私室
又垣外者即以私鹽論商人領引赴場亦在垣
中買築場官驗明放行倘有私販夾帶等弊該
場官役一併重處○又題準鹽船過關止納船

料如有借端盤驗額外苛求者以枉法治罪○
又題準凡獲大夥私鹽必究訊窩家經紀所過
地方有無徇縱管鹽司道扶同不舉者一併叅
究不許以肩擔背負零星小販塞責○又議準
貧民食鹽四十斤以下者免稅四十斤以上者
仍令納課○又覆準竈丁不許克當衙役○又
覆準口外鹽不許侵入長蘆行鹽之地如有違
越照私鹽叅處○康熙五年題準天津大沽鹽
船出口巡鹽御史印給號票填明人數地方防
汛官弁察驗放行如無印票及人數不符夾帶

違禁貨物者。拿獲治罪。地方文武官弁。踈縱者。照所定出禁例處分。○七年題準。州縣衛所官。勒令百姓買引。私派戶口銷鹽者。革職。司道府。都司。不察報。巡鹽御史。管鹽巡撫。失於察叅。照例議處。○九年題準。凡旗人販賣私鹽。照律治罪外。其主。係官。罰俸。係平人。鞭責。佐領。內管領。驍騎校。罰俸。領催。屯長。鞭責。其馬場牧人。有犯私鹽者。領去之。營總。叅領。等。均罰俸。領催等。各鞭責。○十五年題準。各官該管界內。有私煎販賣者。係伊衙役。革職。係軍民人等。降調。如旗人

私煎販賣。本主自行拿獲者。免議。○十七年題準。與販私鹽。文武失於緝捕者。如不及十人。或十人以上。不帶軍器。仍照例議處。十人以上。帶有軍器者。專管官。革職。兼轄官。降級留任。限一年內。緝獲一半以上者。還職。不能緝獲者。照例降革。該督。撫。巡鹽御史。提督。總兵。不行題叅者。照徇庇例議處。若專管官。一年內能獲大夥私販。一次至五次者。分別議叙。兼轄官。亦照例議叙。○二十一年題準。凡私鹽。經沿途官兵捕快。盤獲者。徇縱場官。及失察官。一併議處。○二十

七年覆準各場折課等銀令竈總分催各竈自封投櫃如劣衿蠹役營克竈總包攬收納照包攬州縣錢糧例治罪○二十八年議準私梟全獲沿途失察武職免議○又議準武職拿獲別汛私梟者準予議叙○又題準鹽店設立小票私蓄鹽丁概行禁止有擅用者照違禁例治罪○三十年覆準十人以上帶有軍器與販私鹽係本汛將賊拿獲一半以上者失察各官照例免其處分其本汛雖未拿獲被別汛全獲者亦免其處分別汛雖拿獲少一二人者仍照例處

分○又覆準巡緝私鹽原係運使專責令在伊所轄地方巡緝私鹽毋許差人別往他方巡緝借端生事擾害地方挾制有司○三十三年議準運丁夾帶私鹽沿途各官失察謊稱出境者降調○四十四年題準嗣後興販私鹽事發該管吏目典史知州知縣守備千把總等官失察一次至三次者照例議處道府直隸州知州副將叅將遊擊等官失察一次至四次者照例議處運使運同運判鹽場大使均係專管鹽務之員以後竈丁販賣私鹽大使失於覺察及知情

者處分。運同、運判、照該管州縣官例處分。運使、照府道例處分。至關津過往回空糧船，官座船隻如有夾帶私鹽在船者，將夾帶私鹽之人，照興販私鹽例治罪。管船同知、通判、守備、千總、文武官弁，知情不知情，分別處分。○三十八年覆準江、廣糧艘回空至揚州關，令押運官弁於該御史衙門先通報單，總漕並該御史選委能員，公同盤驗。如有夾帶私鹽，將押運官弁失察各官一併察叅，並令龍江等三關凡遇回空糧船到關亦一體盤察。如有私鹽，即移報督撫、御史。

會同題叅。○四十六年覆準私販致礙官引均係積臬巨罔所致，嗣後鹽法衙門將私販之徒準其用刑拷訊，除正罪外其餘不得濫用刑訊。○四十七年覆準河南陳州、舞陽等屬改食蘆鹽，汝寧一府仍食淮鹽，蘆商各守口岸，毋得紊亂經制，永遠遵行。○又議準淮南綱鹽，令該巡鹽御史親行盤察，分銷船至江楚地方，鹽道即給水程，地方官不得借名盤察需索那借。○又覆準巡鹽御史到任，差人坐守各場口，名為緝私實即射利，急行裁革。○又覆準私鹽之充斥。

皆由總商不革。官自爲私。各賣已鹽。以圖一時之利。今將總商革去。違者該督撫即行指叅。五十六年題準。兩淮河曲。江汊湖港。海濱地方。皆係私販要隘。嗣後外省棍徒來境私販。地方官失察。照從前九卿所定處分例處分。其地方官有能拿獲私販鹽千斤以上者。將該管官弁覈實題請議叙。○雍正元年

諭國家欲安黎庶。莫先於厚風俗。厚風俗莫要於崇節儉。周禮一書。上下有等。財用有度。所以防僭越。禁驕奢也。孟子亦曰。食時用禮。菽粟足而民無不仁。朕臨

御以來。躬行節儉。欲使海內之民皆敦本尚實。庶康阜登而風俗淳。夫節儉之風。貴行於閭里。而奢靡之習。莫甚於商人。朕聞各省鹽商。內實空虛。而外甚奢侈。衣服屋宇。窮極華靡。飲食器具。畢求工巧。俳優伎樂。恒舞酣歌。宴會嬉遊。殆無虛日。金錢珠貝。視爲泥沙。甚至悍僕豪奴。服食起居。同於仕宦。越禮犯分。罔知自檢。驕奢淫泆。相習成風。各處鹽商皆然。而淮揚爲甚。使愚民尤而效之。其弊可勝言哉。司鹽政者。宜約束商人。嚴行禁止。出示曉諭。諄切勸戒。使其痛自改悔。庶循禮安分。不致蹈僭越之愆。而省一日之靡

費即可以裕數日之國課且使小民皆知儆惕敦尚
儉約於民生亦有裨益庶不負朕維風振俗之意若
仍前奢侈不知悛改或經朕訪聞或經督撫叅劾商
人必從重治罪鹽政各官亦不能辭徇縱之咎欽此
○又議準杜絕糧船私販將爲首旗丁按法重
處○二年議準販賣私鹽交與地方官不時嚴
加察緝除零星肩賣者不必緝拿倘有大夥鹽
梟督撫會同將軍撥旗兵協捕其私販爲首之
人與裝載私鹽之船戶拿獲一同治罪拿獲及
出首之人照鹽數議叙○又議準令京口將軍

分撥兵丁於揚子江之三江口瓜洲揚州口等
處巡察私鹽○又議準嗣後如有積梟借稱貧
民將私鹽潛行窩囤興販貿易者令地方官弁
及鹽政衙門一體稽察○又覆準令各省管鹽
督撫巡鹽御史將商人每年應完錢糧務於奏
銷限內照數完納如有拖欠即將該商革退引
窩別募殷實商人承頂所欠錢糧著落該商家
產追賠其原出結各官交該部嚴加議處如有
通同徇隱以欠作完等弊於發覺之日將該管
各官一併從重治罪○四年議準回空糧船經

過產鹽所在該地方文武官弁不行力催任其逗留與遊客囤戶等私相交易至有夾帶之事者將該地方文武官弁并押空官弁察叅照例議處運丁遊客囤戶等照販賣私鹽人等例加等治罪該管鹽務運使等官掣鹽出場務將餘鹽嚴行巡察不許夾帶如有徇隱踈縱發覺之日將運使等官令該巡鹽御史照失察私鹽例題叅議處其竈丁人等亦照販賣私鹽律治罪○又覆準每年糧船回空之時於瓜洲江口分委瓜洲營弁協同廳員實力搜索○又覆準糧

船旗丁水手南北往返必須食鹽準其於受兌上船處每船帶鹽四十斤於交卸回空處亦準其帶鹽四十斤多帶者同私鹽例從重治罪○六年議準拿獲私販本犯脫逃者即將裝帶鹽斤之脚夫水手拘獲到案詳究本犯踪跡勒限務獲照例於私販上加治逃罪售與之人亦照私販例治罪其脚夫水手分別懲治若大夥與販照強盜例勒限嚴緝地方文武官弁照溺職例議處○又議準拿獲私鹽務將人鹽數目據實詳報如有將私鹽入已或與各役分肥不行

據實詳報。並大夥拒捕之案。以多報少者。即將該管官弁。指名題參。計贓治罪。其有未經侵匿者。照徇隱例處分。上司知情故縱。及雖不知情。未經揭發。或於別處發覺者。將該上司。照失察例。分別議處。○又題準。拿獲私鹽。必詳究其買自何地。賣與何人。一併取具確供。照與販私鹽例治罪。若買自場竈。將該管場司。并沿途失察各官。題參議處。其不行首報之竈丁。照販賣私鹽例治罪。倘承審官。不究私鹽之來歷。草率完結。亦照例參處。○又議準。嗣後拿獲私鹽。計其

斤數之多寡。定罪名之輕重。如三千斤以下者。仍照例擬以杖徒。三千斤以上者。即照越境販鹽例。問發邊衛充軍。○七年題準。山東永埠等場。灘廣鹽豐。率皆路積。應於各場適中。設立鹽坵。除計口量留食鹽外。其餘鹽。盡數運入官坵。按季造冊出結。送運使察覈。○乾隆元年

諭。私鹽之禁。所以除蠹課害民之弊。大夥私梟。每為盜賊逋藪。務宜嚴加緝究。然恐其輾轉株連。故律載私鹽事發。止理人鹽并獲。其餘獲人不獲鹽。獲鹽不獲人者。概勿追坐。至於失業窮黎。肩擔背負。

易米度日。不上四十斤者。本不在察禁之內。蓋國家於裕商足課之中。而即以寓除姦愛民之道德。意如是其周也。乃近見地方官。辦理私鹽案件。每不問人鹽。曾否並獲。亦不問販鹽斤數多寡。一經捕役汛兵指拿。輒根追嚴究。以致挾怨誣攀。畏刑迫認。干累多人。至於官捕業已繁多。而商人又添私雇之鹽捕。水路又添巡鹽之船隻。州縣毗連之界。四路密布。此種無賴之徒。藐法生事。何所不為。凡遇姦商夾帶大梟私販。公然受賄縱放。而窮民擔負無幾。輒行拘執。或鄉民市買食鹽一二十斤。

者。並以售私拿獲。有司即具文通詳。照律杖徒。又因此互相攀染。牽連貽害。此弊直省皆然。而江浙尤甚。朕深為憫惻。著各省督撫。嚴飭各府州縣文武官弁。督率差捕。實拿姦商大梟。勿令踈縱。其有愚民販鹽四十斤以上被獲者。照例連結。不得拖累平人。至貧窮老少男婦。擔負四十斤以下者。概不許禁捕。所有商人私雇鹽捕。及巡鹽船隻。幫捕汛兵。均嚴飭停止。毋得滋擾地方。俾良善窮民。得以安堵。欽此。○又題準。六十歲以上。十五歲以下。及少年之有殘疾者。其婦女亦止。老年而孤獨。

無依者許其背負鹽四十斤。易米度日。如不合例之人。概不許借端興販。其稽察之法。令於本縣報名。驗實註冊。給以印烙腰牌木籌。每日卯辰二時。赴場買鹽。擔賣。一日止許一次。並止許行陸路。不許船載。○又覆準沿河文武官弁。凡糧船經過。在於河干。竭力稽察。除留食鹽外。其餘夾帶之鹽。照私鹽例入官。

一引自由單。順治元年定。寶泉局刊鑄銅板。刷印鹽引。每引納紙硃銀三釐。附同正課。交都轉運鹽使司。按年解部。以供刷印。○三年。差官督

理淮浙引務。加戶部侍郎銜。駐劄揚州。○六年。鑄戶部鹽引印。以鈐鹽引。○七年。停差督引部院。仍令運鹽使司官吏。赴部關領。○十三年。定巡鹽御史。先領二季鹽引。赴任。其二季。仍委員赴領。○康熙十一年。鑄戶部鹽茶銀印二顆。鈐鹽茶各引。○十二年。定長蘆。山東。河東。兩淮。兩浙。每年四季鹽引。豫支戶部庫銀。刷印。交新差御史帶往。俟解到。紙硃銀補庫。○十六年。題準將長蘆各場竈戶地丁錢糧。十八年為始。刊刻由單。分送本部戶科。察驗給散各竈戶。○二十

八年議準場竈向無全書刊刻易知由單易於稽覈不必造賦役全書○三十年覆準鑄戶部山東司鹽引之印二顆鈐各鹽引○三十五年覆準鑄鹽引銅板長蘆十一塊山東六塊河東六塊兩淮十四塊福建四塊兩浙八塊花馬大池一塊小池三塊漢中府西和漳縣二塊四川一塊兩廣八塊○六十一年覆準令寶泉局照舊式鑄造新板六十四塊其模糊舊板即交銷燬○乾隆六年題準鑄換鹽引新板六十四塊其舊板即繳銷○十三年各省由單均解交戶

部備案存察○又題準新鑄鹽引銅板長蘆十一塊山東六塊河東六塊兩淮十四塊福建八塊兩浙八塊四川一塊兩廣八塊其花馬大小池西和漳縣毋庸鑄換舊板交與寶泉局銷燬○又定例各省鹽引每年歲底各該督撫鹽政差委官役赴部請領部按其請領之數刷印給發

引式

戶部爲鹽法事山東清吏司案呈照得
處鹽法題準各項事例已經通行遵奉訖所

有引目。除場竈丁人。守禦官吏。軍民權豪勢。要官運鹽貨。偷取插和場戶運鹽。攜帶軍器。諸人買食私鹽。載鹽不用官船。七款。另文申飭外。其題定鹽斤。繳引。二款。并行鹽地方。合行開列。鑄造銅板。印刷。給付客商收執照鹽。前去發賣施行。須至行者。

一某處某運司。凡客商賣鹽。每引淨鹽若干斤。為

一引。給半印引目。每引完納引價。隨即給引支鹽。

一凡客商興販鹽賣。不許鹽引相離。違者同

私鹽追斷。如賣鹽畢。五日內不繳退引者。杖

六十。將舊引影射鹽貨。同私鹽論。偽鹽引者。

處斬。以上二款
各省同

一起運官鹽。每引二百斤。為一包。經過批驗

所依數掣摺秤盤。但有夾帶私鹽。隨發有司

追斷。客商貨賣官鹽。自揚子江。至湖南襄鄖

俱依經過官司。辨驗鹽引。如無批驗。所掣摺

印記者。笞五十。押回盤驗。此款祇載兩
准鹽引內

右引客商。收執照鹽。准此。

另文申飭七款。

一各場竈丁除正額鹽外將餘鹽夾帶出場及私煎貨賣者絞兩鄰知私煎而不首者杖一百充軍

一凡守禦官吏巡檢司巡獲私鹽俱發有司審問犯人絞有軍器者斬鹽貨車船牲畜入官引領牙人及窩藏寄放者杖一百發烟瘴地面充軍自首者免罪常人捉獲者賞銀十兩仍究何場竈戶所賣依律處斷運鹽司盤獲私鹽隨發有司追斷不許擅問有司通同作弊脫放與犯人同罪

一凡諸色軍民權豪勢要人等乘坐私鹽船隻不服盤驗者杖一百軍民發烟瘴地面充軍有官者依律斷罪罷職

一將官運鹽貨偷取或將砂土挿和抵換者計贓比常盜加一等如係客商鹽貨以常盜論若商人將所買官鹽挿和砂土貨賣者杖八十

一起運官鹽並場戶搬運上倉將帶軍器者並行處斬

一諸色人買私鹽食用者減犯私鹽人罪一

等因而販賣者處絞

一各處運載官鹽許用官船轉運如竈戶鹽
丁用別船裝載即同私鹽科斷

